



Jann kregg sin Dogg wehr



von H. Dickmann

Et wor in et Johr negentinhondertfifonvertig in et Frühjohr. Die Amerikaner woren öwer de Rhin gekommen, hadden hier gor nit nett gehaust on woren nau all witt in Duitschland vörgedrongen. So no on no komen all die Menzen wehr, die hier weggelopen woren. Ok Jann on sinne Anna stohnen nau met öhre Blagen on en Handwagen, denn ganz vollgelajen wor met Pött on Pann on Tüch, vör et Hoffhecken. Se wogden gor nit wijer te gohn on keken on keken bloß no öhr Hus. Dat sog alles ganz schäbbeg üt, de Pannen woren all heronder, de Gewel wor drüttgeschoten, de Enddör log newen et Dörenlock, ken Fensterschiew wor mehr ganz, on in de Muren soten grote Löcker.

„Anneken“, sät Jann, „bliev do ma en Ogenbleck met de Kender hier stohn, eck well es kieken, aff wej dor well bliewen können, eck sinn glick wehr hier.“

Ganz vörsechteg geng heij nau in sin Hus, öm alles notukieken. Dat dürden en ganze Tittlang. Ganz ogerägt kom heij wehr.

„Lüj, Lüj, wie de Wandalen hewen se gehaust, in de Kelder ös necks mehr drin, de Käss sind leg, on wat et schlemmste ös, Jolante, ons Meßpoch, ös ok nit mehr dor. On die twej Sack mit dat Poggesfuhr sind ok op den Drapp. Nau sall et ons well schmal bejgohn, on wej mödden den Riem ma enger schnallen.“

So gengen sej nau in et Huß, lajden de Wagen af on fingen ahn opturäumen. Anderen Dags besückten Jann de Nobers, heij woll seck wehr „trögg melden“. Ömmer geng heij dör de ächterste Dör harin, öwer de Dähl, on de Farkesstall verbej, wor heij, wor heij öwer de Rehj kek, aw sinnen Borg nit dor wor. So geng dat nau all einege Dag, on heij hat noch ömmer nit gefonden, wat heij stückten. Et wor mangst ken Ömgonn mehr met öm, so quot wor heij.

Vandag woll heij nau Dores besüken. Sinne Wegg geng wehr dör de ächterste Dör. Nau stohn heij on de Farkesstall on kek öwer de Rehj. Wat wor dat? Sinne

Ogen wodden grot on grödder .Wor dat nit sinne Jol . . .? Dor stohn Dores all newen öm.

„Jann, hew eck nit noch en döchteg Pogg in de Stall?“

„Jo“, sät Jann, „dat kann me well seggen, eck glöw bloß, et öß in de verkierden Stall, on die twe Sack Mähl gehören ok nit hier hen.“

Dat verschlug Dores de Sprok, heij versückten seck tu verteidegen, fon ewer nit de rechtege Wört. Heij woll finaleweg nit tugewen, dat dat Jann sinne Jolante wor on sprok von tugelopen on all son Krom.

„Jo“, sät Jann, „Nau segg bloß noch, die Säck met dat Mehl, die liepen hier ok öm et Hus on sind dör de opene Dör bes on den Trogg gesprongen.“

„Datt Pogg ös et min“, ment Dores.

„Et gehört mej!“ sät Jann. So kewten sej nau hen on her. Schließlek sät Jann:

„Wej sin ömmer guje Nobers geweß on wellen dat ok bliewen. Dat Pogg sall selws entschejen, wor et hengehört, eck well ewkes no Hus gohn on Anneken Besched seggen.“

On weg ös heij. Nau moß Anna Fuhr in den Trogg duhn, de Stalldör openmaken on sek dor dranstellen. No en Ogenbleck ös Jann wehr bej Dores.

„So“, sät hej, „wej drierwen dat Dierken op de Stroht, on dann soll et seck selws entschluten, aw et in dinnen oder minnen Stall well.“

Dormet ös ok Dores inverstohn. Jolante ös ewkens op de Stroht, dor rüpt Anneken:

„Puggupp, Puggupp, Puggupp . . . “ on rappelt on de Stalldör. Jolante steht en Ogenbleck ganz stell, dann böhrt se de Kopp hoch, hält de Nas in de Wend, drähjt de Ohren no vören, quitscht vör Freud on löpt, häst do mej nit gesiehn, wat kannst do, öwer de Stroht, dör de Hech, in de Stall, bes on den Trogg. On Anneken mekt gau de Dör tu.

„Na, Dores, böß doj nau tofrejen?“ ment Jann.

„Et sall well so sinn“, sät Dores, „Nau segg mej bloß noch, wie koß do dat Dier so genau wehrkennen?“

„Jo, dat hättst do ok siehn können, eck hat öhr met Mamm öhre Schere en Krepp op de Schoch inne Bosseks geschnejen, kiek hier.“

De Sommer geng öm, de Wenter kom, on et geng op Chosmess tu. Dor lajden Jann sinnen Nober Dores tu et Kabenöltjeseten in.

„Do häst mej die Jolante so nett verwahrt, dorför mot eck mej doch ok bedancken.“

On es on den andern Dag de Woß ferdeg wor, moß Anneken in en Korf en Stöck Brojfleiß, Metwoß, Lewerwoß, Blutwoß on Pannhas heröwerbrenge.